

四庫全書

集部

欽定四庫全書

集部
宋百家詩存卷六

詳校官監察御史_臣孫家賢

主事銜_臣徐以坤覆勘

總校官庶吉士_臣倉聖脉

校對官中書_臣方大川

謄錄監生_臣汪承泰

欽定四庫全書

宋百家詩存卷六

嘉善曹庭棟編

文潞公集

文彥博字寬夫介休人少從潁昌史炤學炤母異之
曰貴人也仁宗時及進士第知翼城縣判絳州除監
察御史進龍圖閣直學士封潞國公以太師致仕元
祐初司馬光薦復命平章軍國重事六日一朝一月

兩赴經筵五年又致仕居洛陽東田年九十二卒彥
博逮事四朝任將相五十年名震六服居洛時與司
馬光為耆英會在會者十三人又與程顥輩作同甲
會彥博詩云四人三百十二歲況是同生丙午年一
時傳誦崇寧中入元祐黨籍後特命出籍追復太師
諡曰忠烈子八人皆歷要官其少子維申蒐輯詩文
遺藁成三十卷尚書葉少蘊弁序

遊紫雲洞

同登青雲梯遠訪紫雲洞黃冠既前導絳鞵亦後從幽
奇素所希險絕曾無恐況此巖谷遊不知雙鳥重攝衣
叩洞戶肅若心神悚兩崖勢相欽左右如抱擁萬木傍
森羅一水中洶湧信哉天下奇豈適俗間用賞景未盡
興向夕遽旋踵飄然御風行恍若遊仙夢異日期再來
退閒心更勇

寄贈華清觀主大師

五城三洞朝真客紫房名隸神仙籍玉案晨餐沆瀣精

椒庭夜飲流霞液姑山綽約冰雪容亭亭霞外脫塵蹤
飈馭狂遊紫貝閣雲裝醉入白銀宮想陪桂父與金母
崑蓬春賞蟠桃紅愚亦放懷隨澹泊采芝茹朮希彭朔
常祕六泥東竈丹每求五色西山藥紫臺久判浮丘袂
錦川繡嶺三千里羽駕鸞驂未載逢經年望斷函關氣
送子駿朝議歸闕鮮于侁時
罷西臺
累年分領西臺憲留滯周南人共歎蚤傳文價出坤維
為有仙才生閭苑桂籍登科既已久蘭筋飛步終難絆

兩持漕節賦均平
歷守藩符政寬簡
聖皇繼統始謀廟
哲輔官材專進善
巍巍雲闕此歸覲
禁嚴侍從須邦彥
離襟欲判重徘徊
林下相從池上杯
別後思君何處望
肩輿頻上紫金臺

招劉伯壽祕監

君自山中來
熟見山中事
我亦山中人
素懷歸山志
切望青牛車
細問歸山計

題史館兵部傅君草堂欽之

羨君濟上墅勝槩不可名泉石與松竹聲影交相清周
牆數百堵版築皆親營箕尾出南極直對茅軒明陶廬
自愛樂蔣徑堪逢迎但恐赤松子到此難忘情捨卻留
侯伴從吾林下行

過燕川渡

燕川東北孔山西借車直渡馬頭溪農樵引路津不迷
行行引上青雲梯回頭下視林木低谷風泠泠山鳥啼
巖隈泉甘土仍肥昔人於斯卜幽棲春深芝朮生新蕤

采芝茹朮希夷齊諸公共遊不知疲長吟吐氣如虹蜺
水濱石上寫此詩手拭蒼蘚腳踏泥冒寒履險不憚辭
勉欲繼踵前賢題

陽春曲

頗傷金管遽仍恨緹光促四序若循環百年如轉軸佳
人暮不歸蘭苔春又綠空持綠綺琴愁弄陽春曲

玉階樹

亭亭依玉砌鬱鬱盡瓊枝壁月夜雖照金風秋更吹陳

宮唯是唱漢殿只應悲似有君軒戀歲寒終不移

無題

西陵何限柏一一勝瑤華幾縱青絲騎多逢油壁車香
囊猶未致奉帶已成賒莫作雲間月願親梁上霞

山中隱者

塵中久絕跡谷口自忘機草蹻凌晨出柴車向夕歸磴
泉濡蕙帶逕竹敗荷衣借問何為者山中嘗采薇

夜思

明河秋耿耿小閣夜悵悵魯酒不成醉洛生唯是吟簞
涼初卷玉爐暖乍熏金默坐終無寐西窓月影沈

華月

皎皎新秋月分明照洞房幾人千里別今夜九迴腸皓
彩穿珠幌澄輝上壁璫畫樓兼繡戶渾是可憐光

旭日

乍出扶桑海如輪隱半規未晞槃上露已側檻中葵赫
奕晨霞映空濛曉霧披君看可憐處偏在照梁時

詠苔

綿綿上釣磯漠漠擁閒扉石面風梳髮垣根雨濯衣不
將凡卉雜還與俗塵違謝砌曾成詠深嚴近紫微

公子

甲第莪莪爵觀前射回微岸鷁鷁冠錦韉飛鞚丹砂埒
蜜炬流膏紫玉槃狐尾單衣常裏麝虎頭雙綬鎮熏蘭
閒馳便向章臺陌里巷兒童逐彈丸

寓懷

高樓閒背夕陽登，
緲緲長懷不自勝。
錦瑟有時聞北渚，
鈿車何日到西陵。
地寒護草猶難種，
天遠瑤華豈易憑。
多謝蘇門清嘯客，
了無塵事染壺冰。

元已阻雨

林花脈脈怯朝煙，
雨隔蘭亭曲水筵。
欲買春花無定價，
東風撩亂擲榆錢。

酬金華山人春日見寄之什

漠漠鮮雲習習風，
谷鶯嬌囀小園中。
謝塘初長如裊草，

湘渚難留避弋鴻經雨落花紅撲地惹煙垂柳綠繁空
尋芳好伴高陽侶深憶東山采藥公

和友人春日即事

青閣登臨恨已多可堪蘭景又妍和書囊閱盡應成癖
詩思狂來恐是魔玉樹芬芳連霧縠珠櫳隱映隔雲蘿
鸛裘貫得楊昌酒度日無悰倚瑟歌

衡皋

衡薄頻牽望陽林久駐鑣香囊徒叩叩雲月自迢迢翠

佩傳情密層波託意遙
翩鴻漸高逝翻恨隔神霄

春曉

宿靄藏飛觀晨霞幌繡甍錦幃人未起
珠樹鵲先驚
爐暖香初燼
窓幽燭尚明
更開花上露
妝淚鬪盈盈

宮詞

體輕全不勝鸞釵常羨同心上
苑梅翠輦未來珠箔卷
漆盤猶貯夜明苔

登江樓

飛觀接江干，乘閒獨凭欄。
鮮雲橫列岫，芳草蔽遙灘。
梅笛吹漁浦，荃橈汎鷺湍。
登臨謝康樂，寄遠折瑤蘭。

俠少行

錦帶佩吳鉤，翩翩躍紫騮。
垂鞭度永埒，挾彈過長楸。
平樂十千酒，南城百尺樓。
荆娥拂雙袖，日夕又遲留。

秋夕偶懷

小檻風驚葉，幽庭露泣柯。
芳塵千里遠，幽恨九迴多。
螢影穿簾押，蛩聲出砌莎。
寸心無以寫，對月但長歌。

秋夕偶作

獨誦潘郎秋興賦閒吟謝守怨情詩
風搖紅樹啼螿急
月照綠窓清漏遲

古寺清秋日五首

古寺清秋日微涼寶殿中
玉題高納月金鐸碎搖風
翠蘚緣階碧幽蘭裛露紅
閒聽蓮葉漏吟對惠休公

古寺清秋日幽閒景倍殊
晚雲遮鷺嶺新月照蝦鬚
玉露霑籬菊金風落井梧
武丘求泛駕張翰莫思鱸

古寺清秋日登樓擁鼻吟微涼生柰苑輕吹動香林窓
外螢飛火籬邊菊散金靜彈流水曲何處有知音

古寺清秋日潘郎興倍長院閒披鶴氅人靜掩鶯房密
樹驚晨鵲幽軒耿夜螢班姬應詠扇通夕恨昭陽

古寺清秋日舍毫凭小樓雨微滋石蘚煙澹落霜楸紫
燕休巢幙蒼鷹已下鞬閒傾浮蟻酌時典鸛鷀裘

翫月吟寄友人

聞道頻揮霹靂手

見虞曹王
員外之言

定知不費琰之才且投丹

筆攜詩筆來就花間把一杯

送劉推官歸治源棲真館

高情樂幽趣遂與塵事違巖谷久潛照魚鳥知忘機方
邈栗里會卻指治源歸借問歸何遽山中芝朮肥

雷簡夫自辰溪還除國子博士鹽鐵判官以書
見謝并寄杜鵑鳥一隻偶成二章答之

學省新開用退之陽城司業定相知休思杜曲仙鄉隱
好獻元和聖德詩三部共推鹽鐵論五溪曾制虎貔師

濟源處士功成後始信書生善出奇

山人遠寄杜鵑禽因寄山禽遂寄心應謂不如歸去好
高飛卻入舊雲林

送中舍蒲君致政西歸

閬苑當年硯席同別來三十八秋風東朝新命西歸去
珍重賢哉鶴髮翁

送分司少卿歸洪井

知止遺榮世所稀帆風美滿浩然歸江邊聞有梅真宅

吟對西山不掩扉

春日湖上偶作

岸幘長吟坐釣磯
花香漠漠柳依依
夕陽湖面光如鑑
風送虛舟自在歸

外許蘇度支示古銅器形製甚雅輒書五十六
字還之

古鼎良金齊法精
未知何代勒功名
更須梓匠為鳧杓

堪與仙翁作酒鎗

南史有徐景山酒鎗

滌濯尚應勞犢鼻
腥羶不

復染羊羹水邊林下風清處長伴醺然醉玉傾

雨中湖上緋桃盛開舟子維纜於樹因書二十

八言

灼灼穠華照碧流素煙絲雨助妖柔武陵不放劉郎去
更就桃根繫小舟

予移守青社同年宋學士代予守壁田會有來
詩因成四十言為答

舊許陪原郡時清偃息優羨君熊軾去奪我鴨坡遊草

樹秋芳密禽魚晚思幽相憑皆與問猶憶醉翁不

予在許昌

務閒多適湖上
吟醉月三四焉

偶題看山樓新畫山水

盡日望西山扶筇復倚欄遠觀猶未足更作畫圖看

宿西谿寺

地占蓮華麓谿環鷺嶺巔密林含細籟巍剎照清漣獨
賞寧妨醉幽吟定廢眠支郎諳雅尚埽榻就潺湲

公儀天章書示暫往藍田兼閱山水以答來貺

暫枉觀風旆從容賞物華
藍山青有玉輞水碧無沙林
靜聞啼狄川長見落霞
宜尋幽徑處竹里到南垞

雨後遊華嚴川馬上作

雨後城南路無泥未有塵
因觀曲江樹更憶杏園春
草色遙侵水山光翠逼人
幼農兼訪古攬轡緩朱輪

題中山即中華嚴川墅

城南風物勝最勝是華嚴
謝墅偏幽寂顏郎此退潛
流泉清遶砌列岫翠當檐
更愛邨橋畔楊花撲酒帘

次韻和公儀月夕遊南湖

涼夜南湖飲林端月上初尊壘既古雅亭榭復清虛靜
賞興無盡劇譚歡有餘羣騶不解事應厭久停車

見山樓小飲偶作

雲澹天迷楚樓高地占秦哀箏一行鴈小字數鉤銀巷
陌三條月池塘十步春府門初夜閉多少夜遊人

蒙頂茶

舊晉最稱蒙頂味露牙雲液勝醍醐公家藥籠雖多品

畧采甘滋助道腴

答王龍圖遊山見寄

分得魚符守雍州
垂帷閉閣再經秋
眼看巖岫將登覽
身似匏瓜苦滯留
杜曲朱坡雖已到
圭峯紫閣未曾遊
卻輸假道歸朝客
上遍終南寺樓

游潛溪

脩竹蔭清溪
潺湲闕塞西
石牀平有蘚
沙路潤無泥
粉

白松圍古

有古松皮綠而粉生本草艾
藟香真廟愛之駐蹕良久

藍生草帶齊難

留批敕字救旱作雲霓

李藩少時
隱居溪上

登廣化閣

寶刹層峯上危欄淨界中登臨近霄漢子細見伊嵩木
迴傳清梵川長沒遠鴻黃昏不忍去月在石樓東

宿少林寺

六六仙峯繞靜居俗塵至此暫消除西來未悟禪師意
北去還馳使者車

予方被命
移守北都

五品封槐今尚在九年面

壁昔何如心知一宿猶難覺花藏重尋貝葉書

遊金星觀

鶴髮龐眉二老仙
林間老屋十餘間
齋糧不蓄惟栽菊
道眼長明祇看山
朋侶過從應綺角
比鄰掩映是高轅
暫遊自愧塵勞跡
解恰臨溪濯臙顏

僕射侍中賈榮過溟上小園兼題嘉句謹成五
十六言仰謝貴飭

上相尋芳駐畫輪
華貂玉節耀松筠
二南雅麗音盈耳
八體適妍妙入神
魯壁再傳科斗字
稽山長詠永和春

小園從此增花價一室熒煌照乘珍

小園池上偶作

微吟岸幘思悠然近對方塘遠見山恩施洛陽均逸地
莫言此地是偷閒

中書宿齋偶作

鳳閣容棲集心無外慮侵夜涼秋氣蚤人靜禁門深大
政慚無補微才恐不任敔眠聽宮漏蘭焰照青衾

送祕書劉監歸嵩陽隱居

昔年寶應茅齋主別後炎涼已屢經暫入城來緣買藥
卻騎牛去似飄萍緱山重訪吹笙伴祕省常虛舞鶴廳
一任洛陽人白眼且看三十六峯青

和副樞吳諫議寄題廣化寺東軒

淨居高出四禪天更對伊嵩闢廣軒塔聳千花依鷲嶺
舟浮一葉上龍門雲藏古木當危檻風遞疎鐘過遠邨
我有草堂南澗口

即臨伊堂

一回西望一銷魂

雪中樞密蔡諫議借示范寬雪景圖

梁園深雪裏更看范寬山迥出關荆上如遊嵩少間雲

愁萬木老漁罷一蓑還此景堪延客擁爐傾小蠻

白樂天云

酒榼也

和副樞蔡諫議贈副樞吳諫議謝惠新宅雜花
之什

百卉千花淑景新主人吟嘯惜芳辰依依綠減隋隄色
灼灼紅移洛浦春已愛清香飄宴席更分穠艷與交親
鄒陽本是梁園客醉賞猶思灞水濱

再到積慶墳莊即事偶成

郊園乍適疎慵意勉強逢迎已不能赤米白鹽充野饌
蕉衫芒屨見山僧含風古木遮檐角漱玉清泉瀉石棱
田父相過復相勸蚤歸林下醉騰騰

東溪泛舟

東溪伊水東溪水碧溶溶兩漿夷猶去雙鳬上下逢餘
波通洛浦倒影浸嵩峯荷動聞魚躍沙平見鶴蹤島蒲
森劒戟岸柳亞虬龍並載惟禪客隨觀有牧童風傳櫂

謳遠露濕釣蓑濃不是迷津處何煩問老農

遊史館張大卿致政李少卿史館傅兵部濟上

郊園

張靖李章傅堯俞時判
河陽祈雪濟源廟作

疇昔常聞處士莊林泉勝景甲山陽一渠寒水流清濟
千仞濃嵐聳太行枋口雲歸穿古木燕川風過入修篁
前賢舊業何人繼分與三賢作醉鄉

登平崧閣右崧亭作

不較平崧與右崧大都亭閣畫穹崇太行太室當前後

俱是家山入望中

西都留守宣徽王祈謝嵩祠往還敝莊因成雅

章為貺謹次嚴韻

時判河陽

臘雪應祈霑下土
府公遵命祀中天
定陪仙馭經緱嶺
應訪禪林過玉泉
和氣隨風生二室
歡謠繼日滿三川
悠悠大旆纍纍印
卻愛蘇家負郭田

枋口作

下馬入枋口
漾舟緣碧溪
雪消山骨瘦
風定浪頭低
數

里復登岸羣賢俱杖藜徘徊巖石畔尋覓退之題

盤谷作

昔有幽棲士茲焉遂考槃驚眠澗泉響醒酒谷風寒列

岫開窓見冥鴻倚杖觀韓文傳已久合在翠巖刊

舊有石記

今已失之

自濟源回及中道得通守郎中詩跋羨山水之

遊以不得陪從為恨因以詩答之

通判李師錫

奉祀靈源臘雪餘薄寒風景似春初因尋山下遊三日

金匱方
卷六
惟恨尊前欠二車南望思君回五馬北來遺我得雙魚
新詩兩首連城貴百斛驪珠價不如

初泛舟新宅觀子弟輩作詩因為此示之

舊池疏引透新池轉覺澄
瀾勢渺瀾得志魚蝦爭跳躍
無根萍梗任推移船頭欲過衝橋脚
柳眼初開映水湄
借問阿連春草句何人先把紫毫搗

春旱既甚祈未應小園即事

渴望甘膏蘇旱歲日趨祠廟
罄虔祈春風也解相欺罔

鼓扇楊花學雪飛

題韓晉公邨田歌舞圖後

治世舒長日田家事力蘇干戈久不識簫鼓共為娛
酒行無算酡顏倒更扶將求太平象此是太平圖

昨夜飲散未眠偶成拙頌錄呈武功寺丞若猶
未棄無惜開示

以幻能除幻居塵不染塵畧於歌舞地聊現宰官身
有法猶為滯無心乃是真還將所得趣試問悟空人

提舉劉司封訪別將赴滄陽輒成五十六言

劉沈

乞領琳宮作散仙
雲情鶴態任天然
榮驅軒馭歸仁里
懇拜封章解計權
尺璧時光須愛惜
寸金鄉土且留連
銅臺事事君誇詫
莫望西州緊著鞭

招仲通司封府園避暑

騎山樓下水軒東一室初開待白公

白云奇章欲於南溪上別葺一室與

白傳止宿故詩南澗上別開一室待閒人

云終恐不如

雖是不如南澗上都緣卻

有北窓風銜杯避暑稱河朔飛蓋延賓在鄴中解榻況

逢徐孺子饋漿茹飯與君同

金宿樓望月呈仲通司封

是夕與賓佐
會飲後園

滿滿十分酒高高百尺樓於茲賞圓月況乃值中秋天
宇浩無際露華光欲流西園清夜飲公幹不同遊

舟中別後中夕無寐偶成四十言奉寄中輝大

卿史聊致黯然之懷

史
炤

五十年親友如今兩鬢霜相逢在淇澳所樂似瀟湘話
舊如春夢聽歌放酒狂壓關樓下別一夕九回腸

雪霽金宿樓閒望偶作

盈尺初晴皓采鮮
長空極望勢漫漫
銅臺不憚三休上
冰井須添一倍寒
舟楫似從雲外過
園林如在鑑中看
冬來景象今方好
未到黃昏且凭欄

寒食遊壓沙寺雨中席上偶作

沙路無泥地側金
滿園香雪照瓊林
一枝帶雨尊前看
還是去年寒食心

留守相公

康寵召同賞花歡飲兼示雅章次韻

洛表衡皋穀雨天歸來景物尚鮮妍
喜隨使旆尋花圃
急趁賓簪赴綺筵
酒撥嫩醅傾綠液
曲調新譜促朱絃
玉堂仙客應潛笑
強作風情學少年

留守相公寵示東田讌集詩依韻和呈

韓康公

嘗同徐勉構東田
花竹成陰雨後天
為愛憲臺寬白簡
得隨相府賞紅蓮
清尊屢醺吟情逸
紅袖頻翻舞態妍
歸興直須三鼓盡
月華況是十分圓

次韻留守相公同遊龍門

鑿開青障啓天門直瀉伊流淺汝墳

舊說禹鑿龍門八洩汝海之水

節驚濤颺振鼓千花寶塔鴈翔雲巖隈雨過飛泉漲谷

口風回墮葉紛龕穴隆穹三像列樓臺華煥兩崖分方

陪茜旆來尋勝不就蒲飡趁如葦北里笙竽皆擁從東

山羅綺半酣醺升堂共覩蟠仙貌策杖同尋古士墳喜

脫貂冠親野老幸隨熊軾附邦君林巒岑寂真堪賞市

井喧譁漸厭聞人度長川猶隱映香銷古殿尚氛氲周

生歸後蘭重佩荀令行時蕙更薰曉露未晞珠滴淚秋

花爭發錦挑文羣娃散步塵生襪小舫爭登水濺裙釣
叟傍觀皆歎羨禪師迎謁盡歡欣既無冗局羈閒跡忍
促回軒背夕曛得向石頭溪上飲從今遂不畏移文在某
北都累求致政時駕曹林員外以映山紅曲詞見贈尋
答之其末章云遂請後願醉石樓溪口今飲於石樓有
小倡獨得此
曲因以佐飲

頌寄實師順師

傳聞二禪伯共是一家風悟處頭頭悟通時事事通西
堂入妙用寂照舍真空更有青青竹菩提法眼中

余前此二紀保釐西郊與判臺李少師及洛社諸君遊龍門飲伊上有漁者獻鰕魚十數尾因作羹鱠坐客有思鱸之興余後守魏累請休致久而未遂曾為憶鰕詩寄洛下諸賢今年秋累與諸君飲於東田池上葦間鱠魚炊香稻以佐酒浩然有江湖之趣因作是詩并錄憶鰕詩如

左

元豐中留
守西京作

一尊江上思鱸酒兩首伊濱憶鰕詩今日東田遂前請

香稷綠蟻鱠紅絲

嘉祐中余尹河南與少師李公明龍圖董巨源

集賢王伯初同遊龍門漁者得鰕魚數十尾以

助杯棹飲興皆歡日月云邁幾二十年感舊念

遊作憶鰕詩乃思鱸之比也

李東之董沔王起
熙寧中北京作

西風一櫂思鱸興抖擻塵纓歸舊廬最憶香山石樓下

清伊深處釣寒魚

追思洛社閒遊伴屈指於今大半亡若到龍門更聞笛

定知悲感似山陽

遊東田八韻

文物平津閣風流太傅山勝遊松島外故跡藥園間
霜葩編為屋寒荆刈作關窓櫺雲漠漠畦竇水潺潺
蘆渚炊煙起萍漚釣艇還竹經朝雨翠荷借夕陽殷
幽興能招隱高情自愛閒從來行樂處攜手一開顏

次韻致政中散荀龍寵惠雅章

承枉安車訪孟津披雲喜覩舊風神昔年交會心相契

今日朋從意轉親
華髮並蒙難
老福清尊莫作獨醒人
高門積慶簪纓盛
世上尊榮孰比倫

次韻留守相公玉汝以某赴東莊特賜佳篇

東郊瘠土纔千畝
繞舍團椒僅百家
地接玉泉多草木
路經緱嶺少風沙
能留過客雖無餌
時對清尊亦有花
昔日相君曾降顧
常憂蝸陋不容車

憶東溪

近得洛信云東溪
水漲舟行頗駛

常憶東溪溪上坐
相從惟有野僧來
可憐鷗鳥知人意

料得無機總不猜

東溪奉送景仁內翰歸東都三首

君自東都至西洛風光相賞不相違
瑞雲承露從頭看看到姚黃興盡歸

暮春修禊洛川遊絲管隨登李郭舟
仲損昌言俱未至

凝眸東望不回頭

張仲損
張昌言

送君東至伊東塢東望峯高與白雲
又向嵩雲更東去

花前把酒惜離羣

五老會詩

元豐三年九月范鎮內翰張宗益工部張問諫議史炤大卿

四箇老兒三百歲當時此會已難倫
如今白髮遊河叟半是清朝解紱人
喜向園林同燕集更緣尊酒長精神
歡言還有伊川約好作元豐第四春

為來歲張本

奉陪伯溫中散程伯康朝議司馬君從大夫席
於所居小園作同甲會

四人三百十二歲況是同生丙午年
招得梁園同賦客合成商嶺采芝仙
清譚疊疊風盈席素髮影影雪滿肩

此會從來誠未有洛中應作畫圖傳

贈國信畢少卿

仲衍前此
北京簽判

北京作

鄴下常推七子才
兔園賓客重鄒枚
三千里外出疆去
四五年前點額來
將幙未歸慙老大
使旃重到喜追陪
朔風不度龍沙遠
只向雲中候信回

清明後同秦帥端明會飲李氏園池

洛浦林塘春暮時
暫同遊賞莫相違
風光不要人傳語
一任花前盡醉歸

無為集

楊傑字次公無為人自號無為子自少時即以詩文
名於世嘉祐四年舉進士元豐中官太常時議典禮
因革傑討論精確人尤多之常奉使過泰山觀日出
於絕頂之上重九日賦詩酌酒於華山蓮花之峯繼
被詔從高麗僧遊皆以王事而得方外之樂故於瞿
曇尤造理窟元祐中以禮部員外郎出知潤州除兩
浙提點刑獄卒年七十生平著述甚富散亂未傳紹

興癸亥知無為軍趙士彰搜其遺藁得詩賦雜文若干篇編次十五卷題曰無為集其釋道二家詩文另編別集

幽谷吟上歐陽內翰

除山插空望不足行信馬蹄入幽谷生平未慣塵外遊
先酌寒溪洗塵目自疑身是武陵客誤逐桃花迷水曲
欲窮本始問歲月亭上雄文鑿青玉意高語險測難到
拂白散雲再三讀乃知造作自混沌山神固護寶藏匱

路岐未許車馬通白日蒼煙走麋鹿一從紫府仙人來
指出洞天三十六膏澤疏開不死泉棟梁養成歲寒木
靈苗黑草無根株搖蕩清香過林麓峯巒圍匝別是天
天在山中成大畜先生之心此其象往行前言深蘊蓄
議論吐為仁義辭文章散作生靈福默笑真工功未醇
飮餽春風弄紅綠聃云谷得一以盈以一能應無窮聲
千古萬古聲不盡先生得之為聲名公之聲名公之心
日益遠大日益深愚儒耳目所不及奮筆空成幽谷吟

屏石謠贈郭功父

屏石屏石何巉巖云初得自江之南沙埋土蝕幾千載
無人辨別嗟沈淹淨空居士物鑒精獲之不啻黃金兼
清泉洗滌露真璞野雲凝結堆濃藍巫峽山前暮雨霽
參差十二排峯尖比干骨朽心不朽通竅至今存四三
蜂房蟻垤豈足數或疎或密爭嶽嵌銅臺古硯置其下
一片皴碧沈寒潭唐朝牛公嗜怪石取之不已其亦貪
爭如夫君一勝百得此自足無傷廉我嘗乘醉到君家

臨風叩以蒼玉簪其聲清越合律呂筍簾可與大樂參
何當琢磨中句股列為編磬歌雲煙問君考擊薦郊廟
孰若藏其青山庵

潛山行

昔年會稽探禹穴探得六甲開山圖圖載潛南天柱山
上侵霄漢下淵泉真人祕語世不傳但見絕頂蒙雲煙
漢武射蛟浮九江舳艫千里來樅陽築壇祈仙瞻杳茫
茂陵檜柏空青蒼石牛一卧叱不起白鹿還歸深洞裏

二月靈鶴有時來洞口桃花泛流水

歌白雪

歌白雪雪滿龍沙暮冬月萬里征人歸未歸一聲曉角
雲中咽

歌白雪雪壓樵夫樵擔折行到都門門欲開十二玉樓
歌未徹

勿去草

勿去草草無惡若比世俗俗浮薄君不見長安公卿家

公卿盛時客如麻公卿去後門無車惟有芳草年年加
又不見千里萬里江湖濱觸目淒淒無故人惟有芳草
隨車輪一日還舊居門前草先除草于主人實無負主
人于草宜何如勿去草草無惡若比世俗俗浮薄

古行路

古行路古行路今人欲追古人去古人去遠何可追後
人視今如古時君不見去年春風去已久今年春風亦
依舊

和酬子瞻內翰贈行長篇

雲濤擁開滄海門鼓聲萬疊鳴江邨仙翁引我峯頂望
耳目震駭難窮源黃金鑄鯨為酒尊桂漿透澈冰雪盆
吳歌楚舞屏不用夾道青玉排雲根經綸事業重家世
音問父子今季昆九丹鍊就鼎竈溫刀圭足以齊乾坤
我行欲別別湖山去為我索筆書長言照乘不假明月珠
自有光燄生軺軒

五雲叟琴閣

朝望五雲山暮望五雲山望之欲去未得去抱琴登閣
聊怡顏琴聲噴潺湲意在山之泉琴聲險欲絕意在山
之顛五雲之山不須到勸君但作五雲操

凌歊臺

大明七年暮冬月宋武南巡立雙闕鑾輿先幸凌歊臺
雲中簫鼓轟春雷六龍一去曉無迹山花野鳥空相憶
翠羽鳴鞭來不來景陵芳草年年碧

景雲軒

南城城外山崔嵬景雲軒上無塵埃雙溪水落逐年急
白髮僧歸何日來畫屏滿目萬瓦合幾人到此心如灰

恭軒

春雷驚起蒼龍角春風擺開紫雲幃埽斷紅塵不得來
翠羽旌幢擁高閣高堂老人年八十朱衣省郎侍傍立
追懷手植先大夫栽培灌溉何勤劬濃陰潛蔽芝蘭徑
美實飽供鸞鳳雛幽軒得名名曰恭見此還應桑梓同
豈惟雪霜不可改年年高節推清風

留春亭

古今春過知多少人不留春白頭蚤
君欲留春心可知為君更賦留春詩
留春莫只留花住花老春風亦隨去
孰若芝蘭香不歇亭下長如二三月

滄浪亭

滄浪之歌因屈平子美為立滄浪亭
亭中學士逐日醉澤畔大夫千古醒
醉醒今古彼自異蘇詩不愧離騷經

送陳資道

有客抱荆璞不琢貴自質兢兢三十年常恐有墜失所欲價百倍今也十之一忽患知者難光采已四出

豫章行送周裕

君不見南浦亭前草送人千里道一番膏雨一番青不顧王孫江外老又不見豐城劒埋塵土間幾年秋水澄波瀾夜深直氣射牛斗變化風雷頭角寒丈夫窮通有時有滿腹詩書滿尊酒行行三月到揚州故人莫笑麻衣舊

贈朱伯原

張籍心不盲何必盲於目伯原道不病今也病在足及
第二十年未識太倉粟樂圃德義重可敵萬鍾祿世味
覺幻夢老把華嚴讀九會發淵微贊文煥珠玉洞庭秋
月澄吳門春草綠香海泛虛舟不懼魚龍觸

豐湖歌

惠州風土隔世埃使我南望長徘徊昔年霹靂轟蓬萊
六鼇踉蹌海面開一峯崢嶸九霄落萬里怒濤推擁來

至今浮在羅山畔玉閣石梁插天半世人可見莫可登
雪棧雲梯知幾層近聞更有豐湖好環匝亭臺映州島
野叟忘機鷗鷺閒寒潭無浪蛟龍老雲歸洞府月滿灣
客卷綸車魚在藻白玉抽苗萬蓋圓翠光期壓王孫草
天高日暖荔枝香風撼一川紅瑪瑙主人丹鼎飛金虎
豐湖無根豈能住一日地軸如走丸隨逐浮山還舊處

謝公約惠墨竹圖

幽人漬墨寫成竹變化琅玕作玄玉公約贈我兩大軸

不比丹青凡草木六月都城苦炎燠車馬紛紛正馳逐
曲臺官冷晝掩闕淨埽虛堂展霜幅簾間忽有微風來
不動纖枝清滿屋憶得扁舟載雪時曾寄會稽江上宿
和謝判官宴南樓

解后高軒須水漬名言間發蘭桂芬道義相投有餘樂
賓主交照無繁文忠臣寤寐在北闕古風歌詠追南薰
出門不覺行役苦舉頭時見孤飛雲

白月池

鑿池待明月池成月自來幽人從一去明月來幾回孔
竇走龍蛇斷崖激瓊環安得藉盤石汎我木癭杯

治平三年秋七月當塗郭功父招無為楊次公
會於環峯時五雲叟陳德孚以詩寄吾二人因
聯句酬之

空山坐寥落匹馬邀俊哲入門肆高談清風埽煩熱功
父憶昔治平年姑熟溪上別歲時激箭急倏忽三十月
次公讀書非少銳欲論先卷舌歸田殊未成累累逐羈

靴功父孰謂趙魏老不能佐滕薛由來歲大旱松柏見

孤節

次公

朋心久愈摯忠規補殘缺兒童喜父執釘鉅

成羅列

功父

壺有玉泉酒庖有冰裙鼈野茨剖珠璣秋

瓜咀霜雪

次公

新粳刈且春香炊軟三浙放匕聊醉飽

百憂旋磨滅

功父

昇平擊堯壤險怪探禹穴吐氣直虹

蛻落筆淬金鐵

次公

詞源河漢翻俯視隄防決文章貴

天成追琢幾竄竊

功父

抵掌萬古中高下爭螳蛸挹酌

華陽水蕩滌塵土咽

次公

吾心了何染本理忘巧拙聖

賢久不作情偽愈分別

功父

竹陰卧片石浩歌聲欲闌

山童脩及門喜音屈高潔

次公

傳聞脫世累天境妙搜

扶疎簾卷危閣九華青嶂嶠

功父

餘吟琴一弄鏗然響

環玦老鶴不敢鳴千里飛雲絕

次公

次君功素交嗟予

尚契闊疇能枉籃輿相期出寥泲

功父

崔仲岳隱居松江以丹白黑飾舟曰鶴舟括蒼

周子韶無為楊次公治平三年夏六月會仲岳

於繁昌蓬萊亭勉其罷鶴舟以應書席上聯句

送之

且就飛龍榜休登白鶴舟

子韶

隴書方勸駕蘭苑莫回

頭

次公

丹頂歸滄海霜翎擲素秋

子韶

海鵬期變化仙

驥任沈浮

次公

煙月閒三島功名重五侯須知馳鳳詔

便是釣鰲鉤

子韶

已得翀天便無思擊漿遊

次公

楚醪

鏗逸韻湘瑟助冥搜

子韶

南浦成春別北山空夜愁九

皋聞象魏一葉寄汀州

次公

世氣騎風虎機心走海鷗

子韶

昔年嗟鷁退今日並麟遊

次公

八月仙查駛千齡

聖德優市朝真大隱算賴謾清流

子韶

鼓枻隨漁父乘

桴笑仲由片帆從此卷舊筆亦應留

次公

冠佩重華國

鶯花四皓樓雄文高鴈塔大醉憶蓬丘

子韶

勳若書青

史幢須建碧油蘭橈好重舉乘取上揚州

次公

送沈漢卿拜母墓

慈母冢前柏孝子眼中血根在葉長青恩深淚難歇二
月黃鶯鳴一路元猿咽

牛渚磯修水府祠

并序

牛渚在太平州之北里即溫嶠然犀之所也
石岸險隘江流湍激頗為舟楫之害有水府
祠南唐保大年封其神以王號國朝祥符中
從而加封舟人將過之必先陸走具牲幣以
禱焉及慶厯初朝命開新河於磯後而獲安
濟則禮事稍損祠宇多敝嘉祐七年章太守
命修之傑因賦之且警來者

牛渚磯大江凶凶山嶮巖舟人欲渡不敢渡烹牲投簡

先禱祈自從疏派得安濟禱者漸疎祠宇墮我聞鬼神
若君子不以風濤為福威吁嗟人心自險易昔也兢兢
今也違太守修祠豈無意寄語安者毋忘危

景靈宮

仙宗司玉厯帝系出璇霄功業超千載威靈會六朝聖
孫嚴子事神武耀文昭遊渭衣冠在違顏咫尺遙奉安
先上衮守衛肅中貂重屋華天篆櫺星屏俗囂麾幢迎
寶輦象魏起祥飈霞醴充流瓚芝房陋炳蕭降升瞻穆

穆謦欬聽寥寥複道悲追漢靈旂想伐遼薦新隨四孟
觀德序三朝養慕皆虞氏聲名格有苗庭分五行舞樂
奏九成簫將相旌遺烈松筠鑒後凋肖巖非特說畫閣
豈惟喬寰海名星聚江湖王氣銷基圖傳久大宮闕壯
嶢嶢皇澤彌霽霈羣生荷益饒侍祠叨旅進賡頌仰材
翹孝治光青史瓊瑤合琢雕

過黃陵廟

黃陵二妃廟客過動愁顏湘水有時盡帝車何日還血

斑千畝竹魂斷九疑山欲問蒼梧事白雲生棟間

簡寂陸先生祠

紫霄峰下陸先生飛出紅塵鶴羽輕高第不知朝玉闕
舊山重喜見霓旌斗壇石凝雲三尺丹井泉寒月一泓
昨夜全家宿琳館尚疑雞犬有遺聲

和伯瞻郎中登郡城北樓

樓上高吟思入微白雲隨步拂人衣幾行塞鴈斷不斷
千里客帆歸未歸食廩稻梁知國富弟兄疆境樂家肥

望中孰謂長安遠路去江南只數圻

和程大卿雨中登物華樓

澤國連朝雨春山半夜雷登樓寒食近隔岸畫屏開沙
鳥飛還止漁舟去復來年年南浦草相伴綠波回

題具區閣

閣占具區澤登臨萬象奇中秋月明夜平旦日生時雲
澹雪千里水澄天四垂漁舟何處在一笛順風吹

余卿新第

章水營居不日成皇華詩價敵連城簷牙雨過千鱗碧
池面風閒一鑑清脩竹短牆儒者宅白頭青眼故人情
莫憂退處生涯薄鶴引新雛遠砌行

和穆父待制竹堂

會稽風土竹相宜傍竹為堂趣尚奇內史舊居經幾代
此君高節似當時林無暑氣客頻到筍過鄰牆僧不知
莫夾桃花引蜂蜨實成須與鳳皇期

浮玉僧建亭蒜山之頂丹陽新舊太守林子中

楊次公首登之因名二翁亭

來陪杖履躡孤峯故老旁觀歎二翁海上波平千里白
江東兵壯萬旂紅雲開雲合山頭月潮落潮生渡口風
須約蒙莊老仙客憑欄直下看龍宮

同浩然正叔賦夏英公宅延春亭得登字

九衢塵土袞車聲一到延春世慮澄暖律解教寒谷變
熙臺還許衆人登蘭生舊砌香連續花入名園價益增
莫笑冷官連騎過長安城裏有誰曾

和晚登故豐門

故豐門近子真家樓上高吟冰齒牙帆似馬來思杜牧
劍為龍去憶張華滿還故道穿城角沙漲平川壓水涯
江外西山銜落日幾重蒼翠襯餘霞

張司封泗上春運

經綸才術致唐虞暫出東南總轉輸德教久為諸郡法
國家何止十年儲清風繼世留淮甸和氣先春入汴渠
不日召歸調鼎鼐一封天上紫泥書

遊寶林招李簿梅尉

東郭乞米聞曉雞
藍輿乘興過涇谿
冰開波面白玉碎
雪壓竹梢青鳳低
仙去空留鍊丹井
境清疑有辟塵犀
子真太白曾孫在
飛擢何妨到水西

送張令同年赴嶺南

滕王閣上正持杯
候吏先期過嶺來
澤國暫拋三徑菊
春風須寄一枝梅
昔年身到仁宗殿
同日先驚禹穴雷
萬里青雲有前約
莫因藍綬歎塵埃

劉純之以便親請還蜀

通守臨川郡家山夢翠微願辭靈運史欲著老萊衣萬
事尊前盡片心天外歸金烏伴去櫂日日向西飛

賦梅送黃庭方

子行何所贈贈子一枝梅長共雪霜約故先桃李開清
香隔年在和氣引春回上國人相問為言南嶺來

贈朱漢臣先生

德義輕軒冕有誰知所存清風滿淮國高節老巢門孝

友敦兄弟詩書教子孫何當對明月林下接君言

送姜厚兄弟

之子別庭闈鄉心夜夜飛
芝蘭經歲老鴻鴈傍春歸
芳草隨征櫂和風上綵衣
鳴榔聲漸遠月滿釣魚磯

和酬致政朱殿丞

挂冠清世詠歸田舟縱江湖
養浩然水底病龍思致雨
樹頭老鶴懶衝天詩因社友
編三百酒為春風費十千
今古辭榮人不少惟君知足
最當年

和謝聖藻遊錦川

錦川亭上雨霏微
太守齋航卷畫旂
步入名園鶯慣見
歌隨流水鷺驚飛
憑高自有千峯聚
飲劇方知萬事非
卻恐丹陽赴官去
此心當共白雲歸

藉田集議

甸師經始遇金穰
禁籞清尊合奉常
千畝方田開帝耦
四時和氣聚神倉
青氈改卜先農兆
曲水交流上巳觴
欲識漢家林苑富
融融春澤浸長楊

舟泊太湖

區區朝市逐紛華不信湖心有海查
八十丈虹寒卧影
一千頃玉碧無瑕古今風月歸詩客
多少尊鱸屬酒家
安得扁舟如范蠡煙波深處卜生涯

贈馮揚州

天下無雙士淮南第一州文章老元帥
節義古諸侯
路穩歸黃閣功成建碧油九重致堯舜
四海望伊周
楚甸供吟筆吳丘賴坐籌風雲生鷁首
蛟蜃怯龍頭
有士依

餘庇干時愧拙謀
滄溟波浪險願借釣鼇鉤

答宗臣佳章

幽閒外世緣白日抱琴眠
詩就多驚俗樓居半是仙
竹牀斜倚杖蘚壁倒垂鞭
翻笑紅塵客馬頭韁轡牽

秀溪寒食

十里喧闐繡錦川
秋千人近趁飛鳶
花明柳暗丹青國
日暮雲濃水墨天
遊女踐成芳草徑
畫船衝散碧溪煙
武陵漫說桃源好
屈指如今幾百年

夜泊偶書

過得重湖日已斜相依漁艇宿蒹葭故園水面一千里
明月渡頭三四家客路漂流身似梗世途紛冗事如麻
卻欣歸去逢寒食醉倒春風爛漫花

老子渡關圖送張會稽為壽

祕藏函谷關中子持贈蓬萊閣上仙願得髭鬚如此老
卻教龜鶴羨長年

魏徵君草堂

召伯甘棠國東郊處士家百年三世隱泉石當生涯

登南樓

此樓此景他州無天高水闊連平蕪楊柳深處杏花發

日暖數聲山鷓鴣

題陳令壁

地勝汗山國風清令尹家酒闌寒食夜月上海棠花

水月軒

湛碧一泓泉中涵千古月不比天上輪三五有盈缺

逢碧亭

幽鳥無心去又還
迢迢湖水出東關
暮雲留戀飛不動
添得一重山外山

斗野亭

八月風高浪渺瀰
仙公醉倚海查枝
夜深曾傍亭邊過
亭上主人知不知

送陳令歸無為

楚水漾輕碧
楚花飛亂紅
故人故鄉去
半雨半晴中

太白桃花潭

桃花潭似武陵溪
太白仙舟去欲迷
岸上踏歌人不見
年年空有鷓鴣啼

東峯白雲院

僧愛白雲谿上飛
白雲飛處敞禪扉
莫言便是無心物
憶著故山依舊歸

留題城西水磨

客來亭上脫春衫
馬浴寒泉洗轡銜
怪得主人留再住

水聲林影似江南

訪吳尉不遇

品深陰薜蘿金鬣弄寒波莫愛江湖好江湖罾網多

遊白雲山醉題僧壁

買得青山不用錢金沙門外草綿綿黃梅老令醉欲倒
擬借白雲今夜眠

野寺

澤國春風老雜花間芳草門前車馬稀竹葉無人埽

山房枕上作


十里溪源尋未見忽逢蓬屋白雲堆竹牀紙帳睡正穩
無奈野猿驚覺來

天台思古

行人遊盡天台路山家杳杳知何處惟有山前一派溪
落花依舊流春暮

還慶師扇

贈我心無著還師理亦然秋風歸舊谷明月上青天



宋百家詩存卷六